



Aqqalu C. Jerimiassen

UKA 2022/109+141

Atassut

04. september 2022

Imm. 109

Soraarnerussutisiaqalernissamut aaqqissuussinermut peqataasussaataaneq pillugu Inatsisartut inatsisaata allanngortinneqarnera pillugu Inatsisartut inatsisaattut siunnersuut.

(Aningaasaqarnermut Naligiissitaanermullu Naalakkersuisoq)

Isertuanata Atassummiit oqassuugut, neriussimangaluarluta una siunnersuut tassaajumaartoq, pinngitsaaliissummik katersisussaataaneermut atorunnaarsitsinermik siunertaqassasoq.

Taamaanngitsorli paasinarsivoq, uani siunnersuummi taamaallaat annerusumik inuit qanoq isertitaqarneri malilluginaasiit agguluneq.

Tamannalu Atassummiit naammaginarpallaanngitsutut taarusupparput, suliaassallu uuma kingumut takutimmagu inuiaqatigut nammineerlutik katersinissaminnut pisinnaanissaat tatiginngikkipput.

Inuusuttagut ilinniarluarsimallutik ilinniakkaminnik naammasseqqammersut, sooq illutaarnissaanut katersinnaanissaannut ilanngartuunniarpagut?

Pinngitsaaliissummik katersisussaataaneq eqqunneqarnialermat naluneqanngilaq, katersarpassuit ilai ilanngaatineqarsinnaanngitsumik ataasiartumik akitsuutitut ikkunneqarnikuusimasut, ukiorpassuillu sulinermikkut katersisimasut qoqassisutullusoq pillugit akilingassarpassuanitsinneqariaarsimallutik.

Innuttaasut akisussaaffiinik tigooqqaaviginiaannarsinnaanngilagut ila. Aap, siunertaasoq ila paasinaraluarpoq, tassalu nunaqqaterpassuagut siunissami soraarnerussutisiaqalersinnaanissaminnut eqqanaarivigineqarnissaat. Taamaakkaluartorli takuarputtaaq, nunaqqaterpassuatta akileraartarnikkut allagartaminni 50% angullugu peqalersimaneri, katersisussaataaneermut piumasqaataasut naammatsissimannnginneri peqqutingalugit, tamannalu malitseqartoq, nunaqqaterpaalussuatta isertitaasa malunnaatilmik appariaateqarnerannik.

Aaqqiisutaalersoq una allannguuteqangaarfiusussatut takorloorneqarsinnaanngilaq, Atassummiillu siunertaasoq allaanerusariaqarnera pisariaqartikkaluarparput.

Soraarnerussutisiaqarnermut pinngitsaaliissummik katersisussaataanerup sooq ingerlattariaqarnera apeqqusertariaqaraluarput, oqareernitsituullu, inuusuttortatta namminneq

aaliangersinnaasussaangaluarpaat sumut katersinissartik siunertaqartissanerlugu, immaq illusinissamut ileqqaareqqaarnissartik salliukkusussagaluarpaat uanngarniit.

Siunertaatigut isumaqatiginngikkaluarlugu Atassummiit ataatsimiitsitaliamukartariaqarsoraarput.

Imm. 141

Soraarnerussutisiaqarnissamut aaqqissuussinermut pinngitsoorani ilaanisaaq pillugu Inatsisartut inatsisaata nr. 21, 28. november 2016-imeersup atorunnaarsinneqarnissaa pillugu siunnersuummik, kingusinnerpaamik UKA2023-mi, saqqummiussinissamut Naalakkersuisut peqquneqarnissaannik Inatsisartut aalajangaaffigisassaattut siunnersuut.

(Inatsisartunut ilaasortaq, Pele Broberg, Naleraq)

Aallarniutitut oqaatigilara, Atassununa Nalerarlu akuttusuupajaarsuarmik toqqaannartorsuarmik isumaqatigiittartugut, unalu siunnersuut tassaavortaaq toqqaannavissortumik isumaqatigiiffigisatsitut taasinnaasarput.

Isertuunneqarsinnaangilaq AIS2022-imut isumaqatigiinniarnermi Atassummiit una siunnersuut assigipajaarlugu toqqaannartumik isumaqatiginniuteqarsimangaluaratta, kinguneqarsimanngitsumilli.

Maanna qujanavissumik una aaliagiiffissatut siunnersuutitut qaqinneqarpoq.

Inuusuttut ilinniakkaminnik naammasserlaat soq illusinissaminnut ileqqaarinissaammi salliunneqassanngila? Taannaasussaangunaraluarmammi sallertut eqqanaarneqaaqqaartussaasoq, malittaaniq illutaareernikkut ilaqutaqalerluni toqqissilluni angerlarsimaffeqarneq pilersinneqassooq. Inuup kiffaangissusaa arsaarinnissutaasariaqanngilaq, inuiaqatigut upperisinnaasariaqarpagut namminiussuseqartut aaliangersinnaassuseqartullu.

Pinngitsoorani katersisussaataitanerup eqqunneqarnera inoqaterpassuatsinnut iluamik aaqqissuussaangitsoq isertuunneqarsinnaangilaq. Aallartisarnernani inuiaqatigiinnut paasisitsiniutigineqarnera amingarsimaqimmat, inoqaterpassuagut ajoraluartumik allaat 50% angullugu akileraartarnermut allagartartik malillugu akileraartussaataalertitersimapput. Ila 6-8% qaammatit tamaasa annaasalerlugit annertoqaat malunnaateqangaatsiarsimassallutillu.

Minnerunngitsumillu uparungassanittaaq ilaalluinnarpoq, pinngitsoorani katersisussaataitanerup eqqunneqartussanngornerani PFA Soraarneq atorunnaarsinneqarneranut, pillaatitupajaaq taallugu ataasiartumik ilanngaattitut atorneqaaqusaanngitsumik 45%-imik ikkussineq. Malitsigivaa, inuppasuit ukiorpanni namminneerlutik sulillutik katersorsimasaat "tammaannartinneqarmata", ila pisoq taanna tupigusuutiginaangitsuunngilaq inuiaqatigiit taamarsuaq kaasarfiat tigusiiffigineqarmat toqqaannartorsuarmik. Atagu inuiaqatigiinnut tatiginninnerput qiningaasugut nuisilaarniartigu, qulaaniimmi aaliangersaaniartuarsinnaangilagut nammineersinnaanngitsutut inoqatigut isigalugit.

Atassummiit siunnersuut ilusaatut isikkoqartiinnarlugu akueralugu oqaatigerusupparput.

